



**LAPORAN LIPUTAN MEDIA HARIAN  
SABTU 29 JULAI 2023**

<b>BIL</b>	<b>TAJUK KERATAN AKHBAR</b>	<b>KEMENTERIAN / JABATAN / AGENSI</b>
1.	INISIATIF PAYUNG RAHMAH STABILKAN INFLASI, SH -ONLINE	KEMENTERIAN PERTANIAN DAN KETERJAMINAN MAKANAN (KPKM)
2.	KERAJAAN GIAT USAHA TANGANI KEBERGANTUNGAN IMPORT MAKANAN, SH -ONLINE	

UKK KPKM

UNIT KOMUNIKASI KORPORAT  
KEMENTERIAN PERTANIAN DAN KETERJAMINAN MAKANAN  
(UNTUK EDARAN DALAMAN KPKM, JABATAN DAN AGENSI SAHAJA)

## Kerajaan giat usaha tangani kebergantungan import makanan



KUALA LUMPUR - Kementerian Pertanian dan Keterjaminan Makanan (KPKM) giat melaksanakan pelbagai strategi dalam usaha mengurangkan kebergantungan terhadap import bekalan makanan, termasuk menerusi usaha industri tanaman jagung bijian.

Timbalan Ketua Setiausaha (Pembangunan) Pejabat Timbalan Ketua Setiausaha (Pembangunan) KPKM, Datuk Badrul Hisham

Mohd berkata, berikutan itu kerjasama semua pihak terbabit bagi mendapatkan sumber tanah untuk meningkatkan pengeluaran bijirin negara adalah perlu bagi menjayakan usaha tersebut.

"Langkah untuk mewujudkan industri tanaman jagung bijian ini telah dimulakan sejak tujuh tahun lepas. Sekarang kita di pertengahan jalan dalam menstabilkan industri dan turut dijadikan sebagai makanan ternakan iaitu sebagai alternatif dedak.

"Tempoh yang diperlukan untuk industri ini berkembang adalah 15 tahun. Apabila lengkap sekitar 2032 atau 2033, kita akan bersedia untuk memulakan tanaman jagung bijian secara besar-besaran di negara ini," katanya pada program Ruang Bicara bertajuk "Malaysia MADANI: Cukup dan Terjamin", terbitan Bernama TV pada Khamis.

Keperluan bijirin dalam sektor ternakan negara adalah penting bagi mengawal kenaikan harga ayam dan telur ayam berikutan kebergantungan ternakan ayam sebanyak 65-70 peratus terhadap makanan itu.

Badrul Hisham mengulas pengumuman Perdana Menteri Datuk Seri Anwar Ibrahim pada majlis peluncuran Ekonomi Madani: Memperkasakan Rakyat semalam, mengenai usaha kerajaan untuk menumpukan usaha untuk menambah baik Tahap Sara Diri (SSL) serta meningkatkan keterjaminan makanan, termasuk menambah keluasan tanaman dan mengoptimalkan penggunaan tanah perladangan yang sedia ada.

Sebagai sokongan kepada industri makanan tempatan untuk meningkatkan pengeluaran, Anwar yang juga Menteri Kewangan berkata sejumlah RM200 juta disediakan di bawah Agrobank untuk membantu menyediakan kemudahan pembiayaan, khususnya bagi aplikasi teknologi moden pertanian.

Kerajaan turut mengumumkan komitmen menambah baik infrastruktur pengairan kawasan Lembaga Kemajuan Pertanian Muda (MADA) di Kedah dan Perlis bagi meningkatkan produktiviti pengeluaran padi kepada lima musim dalam tempoh dua tahun melibatkan prasarana bernilai RM3 bilion.

Pengumuman lain termasuk peruntukan sebanyak RM42 juta bagi Program Bina Kerjaya untuk pekerja tidak formal termasuk pekerja gig.

Mengulas perkara itu, Pengerusi Kumpulan MyCreative Ventures Sdn Bhd (MyCreative) Datuk Muhammad Bakhtiar Wan Chik yang menjadi tetamu pada program Malaysia Petang Ini terbitan Bernama TV, menyifatkan rangka Ekonomi MADANI sebagai selari dengan peranan industri kreatif terutama meningkatkan kualiti dan kesan positif hidup kepada rakyat, menyediakan peluang pekerjaan, menyumbang kepada pertumbuhan ekonomi serta peningkatan pembangunan sosial dan budaya.

Menurutnya, MyCreative misalnya telah menyalurkan bantuan kewangan dalam bentuk pinjaman serta geran berjumlah RM447 juta yang memberi manfaat kepada lebih 1,000 penggiat dan usahawan industri kreatif sejak penubuhannya pada 2016.

MyCreative turut memperuntukkan RM10.9 juta bagi pembangunan industri kreatif yang telah membantu lebih daripada 1,000 penggiat dan usahawan, katanya.

"Bagi tahun ini, MyCreative komited untuk meneruskan peranan serta perjuangan meningkatkan usaha memartabatkan budaya dan warisan tempatan ke persada antarabangsa," katanya. - Bernama

TARIKH	MEDIA	RUANGAN	MUKA SURAT
29/7/2023	SINAR HARIAN	ONLINE	

## Inisiatif Payung RAHMAH stabilkan inflasi



Program Jualan RAHMAH KPDN turut disokong dengan Jualan AgroMadani oleh Kementerian Pertanian dan Keterjaminan Makanan (KPKM) yang membawa hasil pertanian terus dari ladang pada harga yang lebih murah.

Inisiatif Payung RAHMAH yang dilaksanakan oleh Kementerian Perdagangan Dalam Negeri dan Kos Sara Hidup (KPDN) terbukti berjaya menstabilkan inflasi pada kadar yang lebih rendah.

Ketua Setiausaha KPDN, Datuk Azman Mohd Yusof berkata, program Payung RAHMAH adalah manifestasi keprihatinan dan konsep kasih sayang kerajaan kepada rakyat Malaysia, khususnya golongan berpendapatan rendah dengan kerjasama rakan-rakan strategik yang terlibat.

Menurutnya, kedudukan inflasi dengan trend mereda bagi Subkumpulan Makanan di Luar Rumah turut disumbangkan oleh pengenalan Menu RAHMAH pada 31 Januari lalu.

“Inflasi Subkumpulan Makanan di Luar Rumah berjaya diturunkan kepada kadar 8.1 peratus (Mei 2023) berbanding 9.6 peratus (November 2022).

“Setakat ini, terdapat sebanyak 2,922 bilangan operator pengusaha Menu RAHMAH di seluruh negara dan 290 pengusaha menu Siswa RAHMAH di universiti awam dan politeknik,” katanya kepada Sinar Harian baru-baru ini.

Azman berkata, program Jualan RAHMAH yang menawarkan diskaun harga barangan makanan dan keperluan asas sehingga 30 peratus sedang giat dilaksanakan oleh KPDN melibatkan 222 Kawasan Parlimen seluruh negara.

“Sehingga 30 Jun tahun ini, KPDN telah melaksanakan sebanyak 3,557 lokasi Jualan RAHMAH. “Penekanan diberikan kepada pelaksanaan Jualan RAHMAH secara mobil dengan hashtag #KedaiCariRakyat bagi memastikan manfaat Jualan RAHMAH dapat dinikmati oleh lebih ramai golongan rakyat berpendapatan rendah,” katanya.

Jelasnya, Program Jualan RAHMAH ini dilaksanakan dengan tiga cara iaitu cara yang pertama ialah dengan membuat jualan di dalam premis yang sesuai seperti pasar raya, hypermarket dan sebagainya.

## **Kerjasama dengan pemimpin**

“Cara yang kedua adalah secara di lapangan di mana KPDN bekerjasama dengan pemimpin tempatan membawa pemain-pemain industri untuk membuat jualan di kawasan parlimen dan DUN.



AZMAN MOHD YUSOF

“Manakala cara yang ketiga ia diadakan secara mobil oleh rakan strategik KPDN yang akan mengadakan jualan secara bergerak di kawasan pedalaman yang tidak mempunyai kemudahan pasar raya atau premis peruncitan yang bersesuaian serta jauh untuk mendapatkan barangan keperluan harian,” katanya.

Katanya lagi, Program Jualan RAHMAH KPDN turut disokong dengan Jualan AgroMadani oleh Kementerian Pertanian dan Keterjaminan Makanan (KPKM) yang membawa hasil pertanian terus dari ladang pada harga yang lebih murah.

“Sehingga kini sebanyak 620 Jualan Agro-Madani telah dilaksanakan termasuklah di 52 premis kerajaan di seluruh negara,” katanya.

Azman berkata, sebelum ini juga kerajaan telah melaksanakan beberapa program yang memahami dan mendekati denyut nadi rakyat seperti Program Pengedaran Barangan Perlu Community Drumming dan LPG, Program Skim Subsidi Minyak Masak (COSS), Program Subsidi Tepung Gandum dan Program Penyeragaman Harga Sabah, Sarawak dan Labuan.

Menurutnya, semua program ini bertujuan memastikan rakyat mendapat barangan keperluan asas pada harga yang berpatutan.

“Seramai 946 pegawai pemantau harga di seluruh negara melaksanakan cerapan harga dan memantau barangan di premis terpilih. “Data harga yang diperoleh akan dipaparkan di dalam Aplikasi Price Catcher bagi membolehkan pengguna membuat rujukan sebelum membuat pembelian,” katanya.

## **Manfaatkan golongan sasaran**

Azman menambah, KPDN juga komited bagi memastikan subsidi yang diperuntukkan oleh kerajaan dimanfaatkan oleh golongan sasaran dengan melaksanakan Ops Tiris dilancarkan pada 1 Mac yang lalu.

“Sepanjang pelaksanaan Ops Tiris bermula 1 Mac sehingga 20 Julai lalu, sebanyak 8,585 pemeriksaan telah dijalankan di seluruh negara merangkumi stesen minyak, pemborong, pengilang, kuari, pos kawalan dan lain-lain premis dan sejumlah 363 kes (182 kes serahan agensi),” jelasnya.

Jelas Azman lagi, seramai 2,200 pegawai penguatkuasa telah digerakkan setiap hari bagi memantau harga 480 item di seluruh negara dengan 186 item dipantau secara harian.

“Data harga runcit dikutip setiap hari di lebih 1,400 premis di seluruh negara merangkumi pasar basah, pasaraya, pasaraya besar, kedai runcit dan pasar mini.

“Pemantauan yang dilaksanakan setiap hari menunjukkan harga kebanyakan item adalah stabil bagi tempoh empat bulan terkini,” kata Azman.

### Talian Aduan KPDN

- WhatsApp 019-279 4317 / 019-848 8000
- Portal Aduan; e-aduan.kpdn.gov.my
- Call Centre 1-800-886-800
- Emel e-aduan@kpdn.gov.my
- Ez ADU KPDN
- Bilik Gerakan Penguatkuasaan 03-8882 6088 / 6245

### Reaksi



SHEIKH FAROUK SHEIKH MOHAMED

“AEON BiG menyokong inisiatif oleh KPDN melalui pelbagai Program “Rahmah” sejak ia dilancarkan pada Februari lalu. Peluasan program yang bermula daripada Peruncit Runcit hingga kini diperluaskan kepada peruncit dan industri kategori lain menunjukkan lebih banyak organisasi perniagaan percaya kepada usaha gigih KPDN untuk membendung isu tersebut” -

Pengarah Urusan AEON BiG, Sheikh Farouk Sheikh Mohamed



AMEER ALI MYDIN

“Usaha bersama daripada kedua-dua pihak KPDN dan sektor peruncitan penting untuk memastikan rakyat dapat manfaat dari setiap sen yang dikeluarkan. Sebagai sebuah pasar raya besar, Mydin cuba mengekalkan harga yang paling rendah terutama melibatkan barangan keperluan harian”- Pengarah Urusan Mydin Mohamed Holdings Berhad (Mydin), Datuk Dr Ameer Ali

Mydin



DR SHAZALI ABU MANSOR

“Dalam keadaan ekonomi yang tidak menentu ketika ini, saya harap orang ramai dapat berbelanja secara berhemah dengan mengutamakan perbelanjaan barangan keperluan terlebih dahulu. Boleh untuk berbelanja besar tetapi perlu ingat simpanan pada waktu susah” - - Pakar Ekonomi University College i-CATS Kuching, Profesor Datuk Dr Shazali Abu Mansor



MUHAMMAD SHAM

“Sebagai pengguna, saya harap agar KPDM dapat mengadakan penguatkuasaan lebih ketat terutama melibatkan ketirisan minyak paket agar ia sampai kepada pengguna sasaran dan golongan berpendapatan rendah” - Pekerja swasta, Muhammad Sham Osman, 50



RUSMAWATI

“Sebagai suri rumah, saya harap agar sebarang kenaikan barangan keperluan harian seperti beras, ikan dan ayam dapat dikawal sebaiknya memandangkan kos kehidupan semakin tinggi terutama keluarga yang mempunyai anak yang masih kecil dan bersekolah terutama sekali penduduk yang tinggal di bandar” - Suri rumah, Rusmawati Senawi, 44